

古文龍虎經註疏卷中

卷二

宋保真師在元嘉少傳思平師在齊指授世世王遵禮
太乙宮養素奇道士周年一印證

故演作丹意章第十四

故演作丹意乾坤不復言丹砂液汞父戊己黃金母鍾律還二六斗樞建三九亦童戲朱雀變化為青龍

註曰故演作丹意乾坤不復言者前篇言大丹之意置立神室妙盡其理故於此篇不復言也丹砂液汞父戊己黃金母者丹砂日也液汞日之魂也戊己月也黃金月之魂也丹砂戊己能生此二物魂魄而為至藥故謂之父母也鍾律還二六斗樞建三九者二六者乃子寅辰午申戌為六律丑卯巳未酉亥為六呂又子為黃鍾午為蕤賓之類主十二時也三九亦十二也斗之所指為建正月建寅二月建卯經歷十二辰也參同契曰消息應鍾律升降據斗樞是也亦童戲朱雀變化為青龍者亦童日也朱雀火也火既運動則日生汞於神

室之中故名為青龍也古詩云五行顛倒術龍從火裏出是也

疏曰夫太極生兩儀兩儀生四象四象生八卦定吉凶故乾天也其靜而專其動而直坤地也其靜而翕其動而闢故經云乾

坤天地之本以離天地之用道生天天生地地生萬物是以乾坤動靜生乎萬物者也天也者虛也陽也剛也父也地也者實也陰也柔也母也自虛而下皆地也自實而上皆天也是以虛實相通而有六爻之變故乾用七九而坤用六八也以四象之數通乾坤之數而老少陰陽之策見矣四而通六得二十四為老陰一爻之策四而通八得三十二為少陰一爻之策四而通七得二十八為少陽一爻之策四而通九得三十六為老陽一爻之策四變之策乾坤之成數六九之變六爻之生數也以老陽老陰九六隨乾坤二卦為變而少陰少陽七八不入也乾有六爻而地得其三坤有六爻而天得其三乾坤兩卦為天地變

通之體常混而為一布於六虛之內隨陰陽二炁升降變化於六爻之中方其乾之動也直而不屈陽光赫赫發於地下變坤下爻而為復是曰初九為陽六爻之主微陽方生二變為臨陽炁方行三變則陰陽交通而成泰萬物萌甲破地而出四變為大壯萬物叢生五變為夬則萬卉見真以至上九變為純乾陽光熒熒過布卯酉之南草木茂盛陽光升于上五色耀于首井泉若冰是謂乾卦用事之時也方其坤之動也闢而不塞陰精肅肅發于天上變乾下爻而為姤是曰初六為陰六爻之主微陰方生二變為遁陰炁方行三變則陰陽不通而成否萬物成實結而垂下四變為觀萬物衰落五變為剝則丹歸藏以至於上六變而為純坤則陰精凜凜過布卯酉之南草木萎黃陰精沉於下五色藏於根井泉若湯是謂坤卦用事之時也故經曰日入地中結精之象再變為復發生萬物者也是知乾坤二體隨陰陽之炁以變動

升降於六虛一晦一明循環晝夜日往月來循環無端而莫知乎紀極者唯一味光之和之炁以成變化耳上古至人知天地之消息陰陽之慘舒故託易象法乾坤準陰陽擬水火自天地至和之炁引日月純粹之精歸於神室之內以變金液點化凡軀而作聖體功德備具位號真人孰不謂之神乎

坤初變成震章第十五

坤初變成震三日日出庚東西分卯酉龍虎自相尋坤再變成兌八日出丁上弦金半斤坤三變成乾十五三陽備圓照東方甲金水溫太陽赤髓流為汞姤女弄金璫月盈自合虧

註曰坤初變成震三日日出庚者朔前夜半子時運行陽火之初日月合璧於畢昴之上乾變坤之下爻而為震卦震卦主事一陽爻生於下則月至三日現於庚方也參同契曰三日出為庚震受庚西方是也東西分卯酉龍虎自相尋者東西二八之

門日月出金木正位既經五日運行火候則龍虎之炁兩相慕應聚於鼎中也坤再變成兌八日出丁上弦金半斤者自六日至八日成上弦乾交坤之二爻而為兌卦兌卦主事二陽爻生於中則月先得半弦平如繩而月現於丁方喻鼎中金火各半也參同契曰八日出受丁上弦平如繩是也坤三變成乾十五三陽備圓照東方甲者自十一日至十五日乾交坤之上爻而為乾卦乾卦主事三陽爻生於上則月光圓滿而月現於甲方喻鼎中金德圓滿得火候也參同契曰十五乾體就盛滿甲東方是也金水溫太陽赤髓流為汞姤女弄金璫月盈自合虧者金液神丹至此太陽之精盛滿神室之內金火之炁化而為汞汞與其母兩相留戀以變金體蟾蜍兔魄互相包裹光耀鼎中姤女之體自成首飾化現金璫喻鼎中金炁漸榮而變成丹汞向契曰蟾蜍與兔影煥炳兩兔俱蟾蜍視卦節免魄吐生光是也太陰自初一日

至十五日光滿至十六日自合虧也參同契曰七八道已記屈伸低下降是也

十六轉相減章第十六

十六轉相減乾初缺成巽平明月見辛乾再損成艮二十三下弦下弦水半斤月出於丙南乾三損成坤成坤三十日東壯喪其朋月沒於乙地坤乙月既晦土木金將化繼坤生震龍

註曰十六轉相減乾初缺成巽平明月見辛者謂十六日已後坤交乾之下爻而為巽卦巽卦主事一陰爻發生於下陽火初退陰符始生平明則月現於辛方也亦如陽火初進之時月生三日同也參同契曰十六轉受統巽辛見平明是也乾再存損成艮二十三下弦下弦水半斤月出於丙南者自十一日陰符再退至二十三日坤交乾之中爻而為艮卦艮卦主事二陰爻生於中則月見於丙方復與上弦同義蓋鼎金水各半也參同契曰艮直於丙南下弦二十三也是也乾三損成坤成坤三十

日東北夜其朋月沒於乙地者自二十六至二十八日坤交乾之上爻而為坤卦坤卦主事三陰爻生於上月光將盡則月現於乙方至於東北陽光既盡是謂夜朋也參同契曰坤乙三十日東北夜其朋是也坤乙月既晦土木金將化繼坤生震龍者自二十八日至三十日陰符到此消盡陰陽之炁各停土與木金相和為液太陽之炁不令於月則太陰之體全無循歷東地再經畢昴之上日月相合水火重施復如其初又以復卦為首繼坤而生震卦也震屬木位在東方故稱龍也又陽火為龍參同契曰節盡相禪與繼體復生是也疏曰自子至巳陽火六時而為進震兌乾主之太陰行度為金液之象也復臨泰壯

之參同契言之甚詳但人不能洞察之耳凡修真之士欲煉養大丹必上知天文下知地理中知人情方能變通造化手握陰陽運日月於爐中而孳生龍虎交乾坤於室內而長養精津金母無產育之勞木父有成功之逸金液化現砂汞成形九轉告終陽光變足善舉立號同明窻塵不惟點石為金服之與天齊老變化之妙無以加此

乾坤括終始章第十七
 乾坤括終始故曰震龍也如上三十日坤生震兌乾乾生巽艮坤八卦列布曜運移不失中
 註曰乾坤括終始故曰震龍也者乾坤二卦為眾卦之父母二卦相索而成八卦乾先索坤之下爻而為震卦以為朔日一日夜半子時陽火發生之始坤又索乾之下爻而為巽卦自十六日夜半子時陰符發生之始也乾納甲壬坤納乙癸參同契曰壬癸配甲乙乾坤括終始是也如上三十

日坤生震兌乾乾生巽艮坤者坤生震卦而為初五日直符次生兌卦而為中五日直符又生乾卦而為末五日直符太陰歷十五日圓滿於甲上鼎中金液亦盛蓋隨卦候而增也乾生巽卦而為初五日直符次生艮卦而為中五日直符又生坤卦而為末五日直符太陰歷十五日光盡於東北艮鄉鼎中金液盛實亦隨卦候而成也乾坤自相生滅為三十日一月之候也參同契曰七八數十五九六亦相應四者合三十易炁索滅藏是也八卦列布曜運移不失中者如上八卦列布於一月三十日中運動陽火陰符一一淩歸神室之內為大丹金液之變化也參同契曰八卦列布曜運移不失中是也

疏曰人之一身亦體天地其中陰陽升降亦與之符契但以六欲七情發之於外而精炁耗損於內終日汨汨不知省覺也能知此通隨順陰陽恬淡守素則天地外交而身中內合一皆應其升降若少思慮

無成賊亦自然延年矣况安爐立鼎法象天地名日月至精引陰陽和炁成神藥而服之安得不為仙哉造金液者須知乾坤八卦納一月三十日日月行度之數日行一度而月行十三度強一月一終終而同官謂之合朔日行三十度月行三百九十五度歷十二月再與日合於斗宿之次為冬至之日也故至人以日月躔度之數為一月運火之期前十五日震兌乾主之後十五日巽艮坤主之離坎定位陽火陰符隨時進退皆依約爻象也

調火六十日章第十八

調火六十日變化自為證神室有所象雞子為容形五嶽峙潛洞際會有樞轄

註曰調火六十日變化自為證者元精在

鼎中難觀其狀如一月數中開鼎視之或金華降少五液結邊乃陽火陰符有太過不及之患再須一月運行結丹之火候也故元精在鼎中受外來符火一一變化難觀其狀以十二時爻象火數即知其動靜

浮沉也參同契曰元精妙難觀推度効符證是也神室有形象雞子為形容者古之至人仰觀天象俯察地理効乾坤而立神至類雞子而法形容虛中一寸而安靈未參同契曰居則觀其象準儀其形容是也五嶽峙潛洞際會有樞轄者地上靈仙分為五嶽其中皆相潛通古人立表為象製壇爐鼎竈符合玄法亦委由相通而使火炁通遠無所凝滯若火散於外則吉凶生於內參同契曰立表以為範占候定吉凶是也

疏曰天地未分象若雞子天地既分陽火升於上而輕清之炁結而為天陰水沉於下而重濁之炁結而為地是謂天地定位也神室者上釜為天下釜為地兩釜相合其形亦象雞子中虛寸餘是謂神室定位也天地交則水中相火而升火中生水而降相交於真土之內而生萬物神室交則火自坎生水自離降相交於戊己之內而生靈氣玄妙神祕亦可知也

發火初溫微章第十九

發火初溫微亦如爻動時上戴黃金精下負坤元形中和流素津參合考三才乾動應三光坤靜舍陽炁

註曰發火初溫微亦如爻動時者凡神丹起火皆依約爻象與十二時同為消息如地雷復卦主冬之令下一爻變而為陽子時之爻也於此時發火未甚有力但溫溫然是謂柔火以應復卦下一陽爻物生之候也參同契曰發號順時令勿失爻動時是也上戴黃金精下自坤元形者黃金乃乾天也上釜也坤元者乃坤地也下釜也二釜相合而為神室也參同契曰上察河圖文下叙地形流是也中和流素津參合考三才者既神室有位則素津靈氣生於其中矣中宮之靈亦喻人心神之所居也故天地人全則萬物名焉金水作焉參同契曰中稽於人情參合考三才是也乾動應三光坤靜舍陽炁者乾天也日也火也乾天運動而水火之精便生於空器之中

而作金液也坤地也月也水也坤地靜居而月水金之精和合太陽流珠而又包聚不至飛走也參同契曰動則循卦節靜則象爻辭乾坤用施行天地然後理可不謹之乎是也

疏曰日屬離位在南方居丙丁之中火之正位也日又舍火火又變體成汞故云汞生於日夜者陽也謂之陽魂也離卦二陽一陰以己土為其神又是坤之中女日又用己上為其光己土者陰位也故以其象配離卦又為日中之光舍其玄色為朱從青變赤故為朱砂也月屬坎位在北方居壬癸之中水之正位也月又舍水水又變體成金故云金生於月金者陰也謂之陰魄也坎卦二陰一陽以戊土為其神又是乾之中男月又用戊土為其精戊土者陽位也故以其象配坎卦又為月中之精舍其素色為黑從白變黑故為黑鉛也汞合離爻以應陰爻之位汞之一物非世間水銀朱砂等物本生於太陽之內名曰神水

是謂真汞也鉛合坎爻以應陽爻之位鉛之一物非嘉州鹹鉛及諸山石間所生也木生於太陰之中名曰白金是謂真鉛也鉛分為二儀神室也汞生為一炁玄液也以象三才天地人也

古文龍虎經註疏卷中

正一天師清微弟子 洪百 製作
道教學術資訊網站

古文龍虎經註疏卷下

陸三

神室先施行章第二十

神室先施行金丹然後成可不堅乎煉化之

器包裏飛凝開闔靈戶希夷之府造化泉窟

註曰神室先施行金丹然後成者既立神

室而得其法則金液有必成之理也可不

堅乎煉化之器包裏飛凝者煉丹之士必

先須堅備鼎器使其中靈汞結凝不得飛

走方可成丹也開闔靈戶希夷之府造化

泉窟者神室有上下之釜開則為二闔則

為一其中空虛水火纜交神物便生故號

希夷白金為母而生水銀號曰金液此丹

之府庫窟宅也

疏曰北方之水生成白金謂之真鉛乃至

陰之精包合陽和隨混沌分判之炁各歸

一元古之至人法象天地生成之道還陽

和之炁於真鉛之中合自然之用製所成

藥此真元之炁也非世間凡物可為若修